

LES
P E N S E E S

D' V N

P A C I F I Q U E,

Retiré de la Cour,

Adressée au R o y,

*Sur les Oracles de la Verité des
affaires de ce temps.*

A P A R I S,

AVEC PERMISSION.

1 6 3 3.



PENSEE D'VN PACI-
fique au Roy.



GRAND ROY,
Grand seruiteur du Maistre
de tous les Roys Qui par vo-
stre valeur & vostre Pieté fai-
tes tant d'exploicts & de miracles, qu'à
peines l'on peut iuger, si vous estes plus
sainct, ou plus courageux. C'est mainte-
nant que les vœux des plus deuosts, & Re-
ligieux esprits vous sont deubs, en reco-
gnissance que leur saincteté releue de la
vostre.

Comme les plus indomptez peuples
& Roys, doiuent franchement aduoïer
que vous estes l'vnique redoutable qui les
pouuez remettre à vostre obeysance, &
à leur deuoir? Que doncques chacun de
tous les Estats du monde face vne partie de

leur office, admirant, & loüant vostre vertu (Grand Roy) comme vous avez parfaictement fait le vostre, nous sauuant de tous les maux desquels nous estions menacez.

Pour moy tenant le party, des solitaires & des bons François (voire des plus affectionnez à vostre Maiesté) incertain si quelque autre entreprendra de vous rendre ce que nous vous deuons, de tres-humbles recognoissances, ie m'expose à vn peril (mais des plus petits de ceux que vostre Maiesté à courus,) d'estre pluystost iuge mal poly dans mes paroles, que non pas ingrat ou mesconnoissant dans mon cœur, des peines que vous avez pris pour nous mettre tous à couuert des orages qui sembloient vouloir s'esleuer dans ce Royaume.

Ie sçay bien que tous les escrits, que pourroient faire tous les hommes, ne pourroient pas adiouster vne plume aux

aïsses de la Renommée , pour les rendre plus vistes à porter vostre gloire en tous les bouts de l' Vniuers: Mais d'autant plus que vostre Gloire est cômune & de grande estêduë, de plus elle oblige les subjets à sa louange; & tout le monde doit sçauoir le sentiment d'amour & de recognoissance qui nous touche le cœur , parmy les peuples pour le grand bien que vous nous faictes.

Le voy, S I R E , les vertus mesme qui suivent la Religion, & celles qui conduisent la guerre, parmy les douceurs de vos admirables triumphes, disputer à qui d'elles on doit l'honneur de ceste gloire immortelle que vous nous acquerez , les mettans esgallement en exercice , par la sainteté de vostre esprit, & la force de vostre courage.

Mais vous, S I R E , qui sçauiez comme il faut triompher en sage Soldat de Iesus-Christ, aussi bien que vous sçauiez com-

battre en Capitaine tres-excellent au dessus de tous les Roys du monde, vous rendez à nostre Dieu tout l'honneur de vos victoires. Comme vous avez receu de sa main la gloire du plus Triomphant de tous les hommes qui furent iamais. Ainsi vous accordez toutes les vertus de la deuotion & des armes, & vous seruez d'elles pour honorer aussi parfaitement vostre Maistre dans vostre bonheur, comme elles vous ont seruy pour mettre tous les perturbateurs de vostre repos, & du nostre, en vn poinct ou à present ils sont fort empeschez s'ils vous doiuent plus de crainte, que d'affection.

Ils ont ressentuy vostre courage & vostre resolution, surpasser leur audace, leur temerité, & leur presumption effrenée. Mais qu'ils sçachent que vostre bonté surpassée en vous tout le reste de vos vertus, d'autant plus que vous estes au dessus de tout ce qu'il y eut iamais de Prin-

ces, & de Roys sur tous les peuples du monde.

Aussi dis-ie vne belle rencontre que ie trouue dans le plus doux & le plus amoureux Pseaumes, & qui dans son premier vers est dedié au Roy, mais que ie croy de nostre France, & qui est chanté comme il le porte en son tiltre, *Pour les Lys, & pour la Victoire.* Que parlant du Fils de Dieu, nous y voyons aussi qu'il y parle de vous, SIRE, & de la gloire que vos Lys & vostre douceur a en toutes vos victoires.

Propter veritatem & mansuetudinem deducet te mirabiliter dextera tua.

Sagittæ tuæ acutæ populi sub te cadent in corda inueni coram Regis.

Sedes tua Deus in sæculum sæculi, virga directionis, virga regni tui.

Dilexisti iustitiam & odisti iniquitatem propterea vnxit te Deus, Deus tuus, odio latitiam præ consortibus tuis.

7.

Qui ne diroit, **SIRE**, que ces discours de Daud ont esté faits pour vous, puis que toutes les vertus & les felicitez que Dieu vous donne y sont depeintes, vostre force, vostre bonté, vostre douceur, vostre equitté, vostre Iustice, & vos victoires qui seront grauées dans le temple de l'Immortalité.

Et pour moy, ie ne peux desaduouer que toutes les vertus entassees des veritez adorables que mon ame conçoit sur tant de graces que Dieu nous a donnée par vos traux & vos soins incroyables, m'oblige, & tous les François aussi, de ne pas estre ingrat à vostre Majesté, vous asseurent que toutes mes intentions sont entierement soubmises à vos loix & affectionnées à l'honneur de vos commandemens, ainsi que Dieu m'y oblige.

Poursuiuez, Grand Roy, mais suiuez tousiours cette main qui du Ciel vous cõ-

duit en toutes vos entreprises, & aux salutaires Conseils de vos Ministres d'Estat, & croyez que vos Lys soustenus & reueſtus de la main de Dieu, seront plus haut esleuez que Salomon ne le fut iamais en toute sa gloire. Son trop de repos luy a causé, peut estre, son incontinence, & vostre pureté signallée, SIRE, vous donne les moyens de trauailler avec tant de bon heur que vous rendrez vostre Royaume le plus florissant de l'vniuers.

Et puis mes solitudes se reiouyront cōme le Lys, & tesmoigneront fidelement à tout le monde ce que l'on vous doit d'amour, d'honneur & de recognoissance. Qui doute donc que nos ioyes ne soiēt communes, & que vostre bon heur ne nous donne de la ioye d'aussi bon cœur qu'elle fait pleurer ceux qui sont enuieux de vostre gloire, & d'autre qui n'ont de fidele affection pour leur Prince Souuerain.

Il faut aduoüer que toutes vos actions dans vos jeunes années donnent tous les iours de nouueaux accomplissemens à ses vieilles Predictions, & dans ma solitude, agité des mesmes mouuemens de Dieu, que nos vieux Peres sentoient comme exemplaires de mes plus solides deuotios, mon esprit se trouuant poussé à des-aveus plus necessaires que libres (comme sont les mouuemens inspirez de Dieu pour des actions signalées) ainsi mes esprits esmeus à chanter les faueurs qu'il vous a desparties, ne se doiuent pas retenir dans la crainte, mais dire asseurement cōme l'un de ceux qui disoit à Cyrus de la part de Dieu, *Vrayement tu es vn Dieu caché, & le Dieu qui te prendra par la main te conduira dans les secrets & dans les Thresors cachez à tout le monde.*

Vous estes, ô grand Roy, nostre Ezechias, nous sommes vos Isayes, vous faites, & nous disons, vous receuez, &

nous racontons toutes les graces que Dieu vous a données.

Et ce n'est pas la moindre, que le choisis que vous avez faict de Monseigneur le Cardinal de Richelieu pour le gouvernement des principales, affaires de vostre Estat : Car ce grand homme d'Estat par ses infatigables traux, a tousiours (sous l'autorité de vostre Majesté) fait dissiper toutes ces vapeurs noires, lesquelles se grossissoient tout à coup sur le climat de diuerses Prouince de ce Royaume, lesquelles souffertes eussent excité quelque dangereuse tempeste, ayant l'œil fixemēt attaché à ces attrouppemēt de nuées, attirées par la chaleur d'une furieuse ambition sur nous, a comme vne puissante action du Soleil en son Midy fait dissiper toutes ces malencōtreuses vapeurs, les escartāt si loin de nous qu'elles ne nous peuuent plus nuire ny se rassembler, ny souffrir de matiere propre à les

revnir, lesquelles d'un soufle d'une halaine ne soiet plustost éuaporées que née

Considerant encore ce qu'il pouuoit & deuoit en ces diuerses occasiōs, & que par vne plus longue conuiuece, le mal foible de son cōmencement se pouuoit augmenrer, en sorte qu'il ne seroit plus curable, par vne longue indulgence, il a tousiours fait rompre ces toilles si industrieusement ourdies, & leur entremise invtile sous la vigilance de ses yeux lincees, lesquels ne pouuoient deçeuoir par les simples apparences, il se faisoit iour au plus espais de leurs nuages.

Le Roy se confiant en luy & en sa prudente conduite, a bien recogneu les effects de son bon naturel, ayāt tousiours rapporté toutes ses actions à la volonté de sa Majesté, comme au centre ou tirent toutes ses affections en droicte ligne, avec vne douce humilité, & telle sinceri-

ré, que son cœur est seulement capable de receuoir l'image de son bien-facteur, où nostre Monarque y contemple cōme dedans vn miroir non flateur, des mouuemens naturellement portez à l'imitation de la fleur du Soleil, à suiure les volonté de son Prince Souuerain.

C'est en luy que ce grand Roy agist si puissamment, que nous pouuons dire avec verité qu'il respire par sa Majesté, animé par sa volonté, & qu'il n'a de vie que pour aymer & seruir la France.

C'est ce que nous deuons admirer & louer en luy, & benir le iour du choix fait par sa Majesté (d'un si grand personnage) pour conduire (sous ses heureux Auspices) les affaires de son Estat par des illustres & genereuses actions.

Nous, nous deuons efforcer d'acquiescer la faueur de sa bien-veillance par la Religion de tous respectueux deuoirs, honorant en luy nostre Roy, comme en

son image viue, pour viure doucement
soubz l'obeissance religieuse de ses loix
en commandemens.

C'est ou nostre deuoir nous oblige
estroitement, & auquel nous ne deuôs
iamais manquer.

Nous luy deuons doncques bien sou-
haïter de longues années, à fin que nostre
repos en soit mieux affermy, & qu'il a-
gisse à l'accoustumée pour la gloire du
Roy & la cōseruation de son Royaume;
ce qu'asseurement il ne manquera iamais
de faire, ny de trauailler pour la tran-
quilité publique.

LES ORACLES DE VERITE'

de Messieurs du Conseil d'Estat

du Roy.

SA Majesté reconnoissant que le Con-
seil bien choisi estoit l'ancre sacrée
d'un Estat bien florissant, sur lequel tous
les accidens communs aux Empires du

monde, qui ne sont regis & gouuernez que par les resnes de la Fortune, n'ont aucune puissance. Vn Estat bien affermy sur le bazed d'un bon Conseil est comme vn Cube, de quelque part qu'il roule il se trouue tousiours sur son quarré.

C'est pourquoy la Majesté d'un si Grand Prince qui a le goult tresbon à bien discerner iudicieusement les Esprits fermes & solides des autres, qui ressemblent au Mercure (qui n'ont de consistance qu'en leur fluide mobilité) a choisi & confié toutes les affaires de son Conseil d'Estat & le gouuernement de ses Finances, à ces Venerables Catons de la France, nourris en la cognoissance des plus grâdes legatios & affaires du mode.

Ils sont tres-judicieux en l'Astralogie d'Estat, & voyent le leuer & le coucher des Astres, & des Planettes, cognoissent leurs conditions, leurs bones & mauuaises influences, de telle sorte qu'il n'y a de

terre assés espaisse pour faire ombre à leur iour & à leur judicieuse prudence.

Ce sont de belles Ames intelligentes, dignes de regir & gouverner toutes les Spheres, lesquelles seruent au mouuement de l'Estat pour y faire conseruer & obseruer l'ordre & l'harmonie qui y est requise, à fin que les puissances inferieures par reuolutions harmoniques, se rapportent à l'autorité Royale comme à vn premier mobile, duquel toutes les autres lumieres doiuent emprunter leur clarté, & n'auoir de puissance que par elle & pour elles.

Le Roy voit par les yeux de ces grâds personnages en tous les Empires du monde, le bien & le mal qui en peut n'aistre, qui ouurét les moyens pour en retirer de l'vtilité, & pour en repousser doucement le mal.

Et cependât quelques vaisseaux d'Argille voudroient leur froiser contre ces

grands Rochers d'une gloire solide iustement acquise, par tant & tant de services rendus à ceste Couronne en toutes les occasions importantes qui se sont présentées, ou leurs actions ont esté estimées par le plus grand Roy qui fut iamais.

La France a vn ttes-grand interest d'être mesnagée (sous le bon plaisir du Roy) par leurs fidelles industries, pour florir & prosperer en toutes rencontres.

Ce n'est rien que l'on enuie leurs places, & la bienveillance que sa Majesté leur porte, il seroit beaucoup aussi à propos, qu'à vn petit Pymée vouloir leuer la masse d'Hercule, ou bien à vn Therfite énerué de soustenir le fardeau d'Atlas, que de vouloir ombrager le Lustre des fideles services qu'ils ont tousiours rendus à la France.

F I N.

